

Ringkasan 20 Usul Tafsir Al-Qur'an

(Yang Perlu dikuasai Untuk Memahami Al-Qur'an Dengan Betul Dan Selamat)

- (1) Tafsir Al-Qur'an dengan Al-Qur'an (تفسير القرآن بالقرآن)**
- (2) Tafsir Al-Qur'an dengan hadits-hadits sahih (تفسير القرآن بالأحاديث الصحيحة)**
- (3) Tafsir Al-Qur'an Dengan Pendapat-Pendapat Sahabat (تفسير القرآن بأقوال الصحابة)**
- (4) Tafsir Al-Qur'an Dengan Pendapat-Pendapat Tabi'in (تفسير القرآن بأقوال التابعين)**
- (5) Tafsir Al-Qur'an Berdasarkan Pendapat-Pendapat Yang Bersesuaian Dengan Qaedah-Qaedah Bahasa `Arab (تفسير القرآن بما يوافق قواعد اللغة العربية)**
- (6) Tafsir Al-Qur'an Menggunakan Fikiran (تفسير القرآن بالرأي)**
- (7) Tafsir Al-Qur'an Berpandukan Ayat Sebelum Dan Selepas (تفسير القرآن بما سبق وما لاحق من الآيات)**
- (8) Memahami Al-Qur'an Berdasarkan Tertib Turun Ayat (فهم القرآن على ضوء الترتيب (النزولي))**
- (9) Memahami Al-Qur'an Berdasarkan Tertib Al-Qur'an Yang Ada (فهم القرآن على (ضوء الترتيب الكتابي))**
- (10) Mengetahui Struktur Makro [Topik Umum] Setiap Surah (معرفة النظم الجلي لكل (سورة))**
- (11) Mengetahui Tajuk Perbincangan Khusus Setiap Surah (معرفة الموضوع الخاص لكل (سورة))**

(12) Mengetahui Struktur Mikro Dalam Setiap Ayat Al-Qur'an (معرفة النظم / في كل آية)
(الخصيف)

(13) Mengetahui Kata Kunci Di Dalam Setiap Surah (معرفة كلمات دلالية في كل سورة)

(14) Mengetahui Kesenambungan Antara Dalil Dan Madlul Dalam Sumpah-Sumpah (معرفة المناسبة بين الدليل والمدلول في أقسام القرآن)

(15) Mengelak Diri Daripada Menta'wilkan Ayat-Ayat Mutasyabihat (الاجتناب عن)
(تأويل المتشابهات)

(16) Mengetahui Sebab Turun Ayat Dan Apa-Apa Yang Bersesuaian Dengannya (معرفة أسباب النزول وما ينطبق عليها)

(17) Mengetahui Ayat-Ayat Yang Menasakhkan Dan Ayat-Ayat Yang Dimansukhkan (معرفة الناسخ والمنسوخ)

(18) Mengelak Diri Daripada Tafsir Golongan-Golongan Yang Sesat (الاجتناب عن)
(تفسير الفرق الضالة)

(19) Mengelak Diri Daripada Riwayat-Riwayat Israiliyat Dalam Penafsiran Al-Qur'an (الاجتناب عن الروايات الإسرائيلية في تفسير القرآن)

(20) Bercermat Dalam Tafsir Al-Qur'an Menggunakan Sains Moden (الاحتياط في تفسير)
(القرآن على ضوء العلم الجديد)

(1) Tafsir Al-Qur'an Dengan Al-Qur'an (تفسير القرآن بالقرآن)

Usul pertama yang perlu dipakai dalam menafsir al-Qur'an untuk mendapat kefahaman yang betul dengan selamat ialah mentafsir al-Qur'an dengan al-Qur'an sendiri.

Antara sebab kenapa usul ini perlu dipakai ialah kerana:

(a) Orang yang bercakap lebih mengetahui tentang apa yang dikehendakinya dengan percakapannya. Dialah yang orang paling patut diutamakan untuk anda mengetahui maksud percakapannya.

(b) Al-Qur'an kadang-kadang menyebutkan sesuatu secara ijmal. Kadang-kadang pula secara tafshil.

(c) Tidak ada sebarang pertentangan di dalam al-Qur'an, sama ada antara perkataan-perkataannya atau antara ayat-ayatnya. Al-Qur'an ialah kalam Allah. Ia membenar dan menguatkan satu sama lain. Ia juga mentafsir, menghurai dan menjelaskan satu sama lain.

Ribuan contohnya terdapat di dalam al-Qur'an. Sebagai panduan ambil saja dua daripadanya;

(a) Di dalam Surah ad-Dukhan ayat 3, Allah menceritakan bahawa Dia menurunkan al-Qur'an pada satu malam yang diberkati. Apakah malam itu? Ia ialah malam Qadar. (lihat ayat 1 Surah al-Qadr). Malam Qadr itu terletak dalam bulan apa pula? Jawabnya di bulan Ramadhan. (lihat ayat 185, Surah al-Baqarah).

(b) Al-Qur'an beberapa kali menyebutkan manusia akan mendapat balasan dan ganjaran bagi segala usahanya. Kalau dia mahu dunia, dia akan mendapat dunia. Kalau dia mahu akhirat, dia juga akan mendapatnya. Orang-orang Islam diajar supaya meminta dunia dan akhirat, kedua-dua sekali. Sesiapa yang mencari dan meminta dunia sahaja, dia tidak akan mendapat apa-apa di akhirat nanti. Pada Allah ada dunia dan akhirat. Untuk mendapat apa-apa, sama ada di dunia atau di akhirat, perlu ada usaha. Al-Qur'an menggunakan perkataan الحِثْ untuk usaha pencarian dunia dan akhirat. Perkataan 'al-Harts' baru dapat difahami dengan betul dan lengkap maksudnya apabila anda mengaitkannya juga dengan ayat 223 di dalam Surah al-Baqarah, ayat 134 di dalam Surah an-Nisaa' dan ayat 20 di dalam Surah as-Syura.

(2) Tafsir Al-Qur'an Dengan Hadits-Hadits Sahih (تفسير القرآن بالأحاديث الصحيحة)

Usul kedua ialah mentafsir al-Qur'an dengan hadits-hadits sahih. Tafsir al-Qur'an dengan hadits-hadits sahih juga bererti mentafsirnya dengan wahyu. Dalam usaha memahami dan memahamkan al-Qur'an ia merupakan sumber kedua dari langit.

Hadits-hadits Rasulullah s.a.w. sama ada berupa ucapan, perbuatan atau pengesahan Baginda yang samapi kepada kita menerusi rantaian (sanad) perawi-perawi yang dipercayai dan boleh dijadikan hujah di sisi para ulama hadits merupakan saluran kedua yang harus diikuti dan dijadikan pegangan dalam pemahaman al-Qur'an. Ini kerana ia juga merupakan sumber mu'tabar kepada umat.

Menurut Ahli as-Sunnah Wa al-Jama'ah, tafsiran al-Qur'an yang bercanggah dengan hadits-hadits yang sahih dan tidak mansukh adalah satu bentuk tahrif (penyelewengan ma'na) al-Qur'an.

Tafsir al-Qur'an dengan hadits-hadits yang sahih juga perlu kerana beberapa sebab berikut:

(a) Salah satu peranan dan kerja Nabi s.a.w. ialah mentafsir al-Qur'an dengan menghurai dan menerangkan maksud-maksudnya. Hal ini sesuai dengan firman Allah di dalam Surah an-Nahl:

بِالْبَيِّنَاتِ وَالزُّبُرِ وَأَنْزَلْنَا إِلَيْكَ الذِّكْرَ لِتُبَيِّنَ لِلنَّاسِ مَا نُزِّلَ إِلَيْهِمْ وَلَعَلَّهُمْ يَتَفَكَّرُونَ ﴿٤٤﴾

Bermaksud: (Kami utuskan Rasul-rasul itu) membawa keterangan-keterangan yang jelas nyata (yang membuktikan kebenaran mereka) dan kitab-kitab suci (yang menjadi panduan); dan Kami pula turunkan kepadamu (wahai Muhammad) al-Quran yang memberi peringatan, supaya engkau menerangkan kepada umat manusia akan apa yang telah diturunkan kepada mereka, dan supaya mereka memikirkannya. (an-Nahl:44).

(b) Allah memerintahkan NabiNya Muhammad s.a.w. supaya memutuskan perkara dan menghukum antara manusia dengan berpandukan al-Qur'an. Allah berfirman:

إِنَّا أَنْزَلْنَاهُ إِلَيْكَ بِالْحَقِّ لِنَحْكُمَ بَيْنَ النَّاسِ بِمَا أَرَدَكَ اللَّهُ ۖ وَلَا تَكُنَ لِلْخَائِبِينَ حَصِيمًا ﴿١٠٥﴾

Bermaksud: Sesungguhnya Kami menurunkan kepadamu (wahai Muhammad) Kitab (al-Quran) dengan membawa kebenaran, supaya engkau menghukum antara manusia menurut apa yang Allah telah tunjukkan kepadamu (melalui wahyuNya); dan janganlah engkau menjadi pembela bagi orang-orang yang khianat. (an-Nisaa':105).

(c) Al-Qur'an sampai kepada kita (umat) menerusi Nabi s.a.w.

(d) Banyak sekali perintah Allah di dalam al-Qur'an diberikan secara ijmali. Hadits-hadits Rasulullah yang mentafshirkannya. Seperti perintah bersembahyang, memberi zakat, memotong tangan pencuri dan lain-lain.

Satu perkara perlu sekali diingat apabila anda mentafsir al-Qur'an, iaitu anda mestilah mengelak diri daripada menggunakan hadits-hadits dha'if (lemah) dan maudhu' (palsu). Hadits-hadits tentang kelebihan setiap surah al-Qur'an yang dikemukakan di dalam kitab-kitab tafsir seperti Tafsir at-Tsa'labi, al-Waahidi, az-Zamakhshari, al-Baidhaawi dan lain-lain, kebanyakannya adalah maudhu'.

Untuk panduan, di bawah ini dikemukakan dua contoh mentafsirkan al-Qur'an dengan hadits-hadits sahih:

(a) Perkataan ظلم biasanya memberi erti kezaliman atau ketidakadilan. Tetapi di dalam al-Qur'an ia dipakai juga dengan beberapa erti yang lain. Dpd hadits Bukhari ke 32 misalnya, diketahui perkataan ظلم yang tersebut di dalam firman Allah s.w.t. di dalam Surah al-An'aam yang akan dikemukakan nanti adalah dengan ma'na syirik atau kesyirikan. Allah berfirman:

الَّذِينَ آمَنُوا وَلَمْ يَلْبِسُوا إِيمَانَهُمْ بِظُلْمٍ أُولَٰئِكَ لَهُمُ الْأَمْنُ وَهُمْ مُهْتَدُونَ ﴿٨٢﴾

Bermaksud: orang-orang yang beriman dan tidak mencampuradukkan iman mereka dengan kezaliman (syirik), mereka itulah yang mendapat keamanan dan merekalah orang-orang yang mendapat petunjuk. (al-An'aam:82).

Rasulullah s.a.w. sendiri mentafsirkan perkataan ظلم yang tersebut di dalam firman Allah ini dengan ma'na syirik, dan ia difahami Baginda s.a.w. daripada firman Allah di dalam Surah Luqman berikut:

وَلَقَدْ آتَيْنَا لُقْمَانَ الْحِكْمَةَ إِذْ قَالَ لُقْمَانُ لِابْنِهِ وَهُوَ يَعِظُهُ يَا بُنَيَّ لَا تُشْرِكْ بِاللَّهِ إِنَّ الشِّرْكَ لَظُلْمٌ عَظِيمٌ ﴿١٣﴾

Bermaksud: dan (ingatlah) ketika Luqman berkata kepada anaknya, semasa ia memberi nasihat kepadanya: “Wahai anak kesayanganku, janganlah engkau mempersekutukan Allah (dengan sesuatu yang lain). Sesungguhnya perbuatan syirik (mempersekutukan Allah) itu adalah satu kezaliman yang besar”. (Luqman:13).

(b) Berdasarkan hadits sahih, rangkai kata المثنى سبعا yang tersebut di dalam firman Allah di dalam Surah al-Hijr di bawah ini:

وَلَقَدْ ءَاتَيْنَاكَ سَبْعًا مِنَ الْمَثَانِي وَالْقُرْآنَ الْعَظِيمَ ﴿٨٧﴾

Bermaksud: dan sesungguhnya Kami telah memberi kepadamu (wahai Muhammad) tujuh ayat yang diulang-ulang bacaannya dan seluruh al-Qur'an yang agung (amat besar kemuliaan dan faedahnya). (al-Hijr:87), adalah Surah al-Fatihah. Imam Bukhari dengan sanadnya meriwayatkan daripada Abu Hurairah, bahawa Rasulullah s.a.w. bersabda: أُمُّ الْقُرْآنِ هِيَ السَّبْعُ الْمَثَانِي وَالْقُرْآنُ الْعَظِيمُ Bermaksud: Ummul Qur'anlah (yang dimaksudkan dengan) tujuh ayat yang diulang-ulang bacaannya dan seluruh al-Qur'an yang agung (yang dimaksudkan di dalam ayat al-Hijr:87) itu. (Sahih al-Bukhari, bab firman Allah وَلَقَدْ ءَاتَيْنَاكَ سَبْعًا مِنَ الْمَثَانِي وَالْقُرْآنَ الْعَظِيمَ). Demikianlah dua contoh tafsir al-Qur'an dengan hadits yang sahih.

(3) Tafsir Al-Qur'an Dengan Atsar Sahabat (تفسير القرآن بآثار الصحابة)

Usul ketiga ialah mentafsir al-Qur'an dengan atsar atau pendapat-pendapat Sahabat, khususnya 'Abdullah bin Mas'ud r.a. (m.32H) dan 'Abdullah bin 'Abbas r.a. (m.68H). Sebelum mentafsir al-Qur'an dengan pendapat-pendapat Sahabat, seseorang pentafsir hendaklah terlebih dahulu melihat al-Qur'an sendiri, apakah ada tafsiran terhadap sesuatu yang hendak ditafsirkan di dalamnya atau tiada. Kalau ada, maka tafsiran al-Qur'anlah yang seharusnya dipakai. Kalau tidak ada, maka perlu pula dicari tafsirannya di dalam

hadits. Kalau ada tafsirannya di dalam hadits, maka itulah seharusnya dipakai. Setelah tidak didapati tafsirannya di dalam hadits, barulah dicari tafsirannya di dalam atsar (kata-kata atau pendapat-pendapat) Sahabat. Demikianlah tertib yang betul dalam pentafsiran al-Qur'an.

Atsar Sahabat diguna pakai dalam mentafsir al-Qur'an kerana sebab-sebab berikut:

(a) Bahasa al-Qur'an adalah bahasa mereka. (b) Mereka mengetahui dan memahami latar belakang ayat-ayat al-Qur'an yang diturunkan kepada Rasulullah.s.a.w. (c) Mereka mempelajari al-Qur'an dan ma'na-ma'nanya dengan Rasulullah.s.a.w. sendiri. (d) Mereka sangat cermat dalam mentafsir al-Qur'an. Perbezaan pendapat dalam mentafsir sesuatu ayat berlaku juga di kalangan Sahabat, tetapi biasanya hanya pada lafaz sahaja. Adapun perbezaan pada ma'na, maka itu sesuatu yang jarang berlaku. (e) Ada jalan penyelesaian yang terang jika berlaku perselisihan pendapat di kalangan Sahabat dalam mentafsir al-Qur'an. Dalam keadaan itu pendapat yang lebih kuat harus dipilih dan ditarjihkan. Dimaksudkan dengan pendapat yang lebih kuat ialah yang lebih dekat dan sesuai dengan al-Qur'an dan hadits yang dinukilkan dengan sanad yang lebih sahih. (f) Ijma' mereka merupakan hujah dalam syari'at.

Antara peribadi yang terkenal sebagai imam dalam tafsir al-Qur'an di kalangan Sahabat ialah 10 orang berikut:

(1) Saiyyidina Abu Bakar as-Shiddiq r.a. (2) Saiyyidina 'Umar r.a. (3) Saiyyidina 'Utsman r.a. (4) Saiyyidina 'Ali r.a. (5) Saiyyidina 'Abdullah bin Mas'ud r.a. (6) Saiyyidina 'Abdullah bin 'Abbaas r.a. (7) Saiyyidina Ubai bin Ka'ab r.a. (8) Saiyyidina Zaid bin Tsabit r.a. (9) Saiyyidina Abu Musa al-Asy'ari r.a. (10) Saiyyidina 'Abdullah bin Zubair r.a.

Antara contoh tafsir al-Qur'an dengan atsar Sahabat ialah tafsiran Ibnu Mas'ud terhadap rangkai kata **هو الله الغناء** yang tersebut di dalam ayat 6 Surah Luqman. Untuk menguatkan pendapat beliau, sebanyak tiga kali diulanginya kata-kata ini: **هو الله الغناء** Bermaksud: Ia demi Allah adalah lagu-lagu. (Atsar riwayat Ibnu Abi Syaibah, Ibnu Jarir, Haakim dan Baihaqi).

Logo of the publisher
= 9 x 10 cm
dimasukkan ke dalam folder

(4) Tafsir Al-Qur'an Dengan Atsar Tabi'in (تفسير القرآن بآثار التابعين)

Sumber keempat tafsir Qur'an ialah atsar Tabi'in dan pendapat-pendapat mereka, dengan syarat ia sampai kepada kita (umat) melalui saluran nukilan yang sahih. Terutamanya atsar Tabi'in dari kalangan murid-murid Ibnu 'Abbaas r.a. seperti Mujahid, 'Ikrimah, Qataadah, Hasan Bashri, Ibnu Sirin dan lain-lain. Tabi'in ialah generasi umat Islam yang merupakan pelapis kepada generasi para Sahabat. Ramai daripada mereka merupakan murid-murid Sahabat. Mereka menerima ilmu agama Islam daripada Sahabat Nabi s.a.w. sendiri. Mereka dinamakan Tabi'in kerana telah betul-betul mengikut Sunnah Nabi s.a.w. dan menurut jejak langkah para Sahabat Baginda s.a.w. Allah di dalam al-Qur'an menyebutkan mereka sebagai وَالَّذِينَ اتَّبَعُوهُمْ بِإِحْسَانٍ (dan orang-orang yang menurut [jejak langkah] mereka [Sahabat muhajirin dan anshar] dengan baik). (at-Taubah:100).

Oleh kerana kalangan Tabi'in yang utama telah menerima tafsiran al-Qur'an daripada para Sahabat yang memang mahir dan ahli dalam bidang tafsir, kata-kata dan pendapat-pendapat mereka juga perlu diletakkan di hadapan apabila anda hendak mentafsir al-Qur'an. Walau bagaimanapun beberapa perkara di bawah ini perlulah sentiasa diingat:

(a) Apa yang diperselisihkan di kalangan Tabi'in bukan merupakan hujah dalam agama. Tetapi apa-apa yang diijma'kan mereka merupakan hujah menurut kebanyakan ulama.

(b) Riwayat-riwayat berhubung dengan tafsir dinukilkan dengan dua cara. Pertama dengan bersanad. Kedua tanpa sanad. Atsar Sahabat dan Tabi'in yang dinukilkan dengan sanad yang kuat sahaja diterima. Riwayat-riwayat Sirah dan Maghazi yang tidak sahih tidak seharusnya digunakan untuk mentafsir al-Qur'an. Imam Ahmad berkata: "Ada tiga perkara (kebanyakannya) tidak bersanad; tafsir, malahim (cerita-cerita peperangan) dan maghazi (Sirah Nabi s.a.w.)." Sebabnya Imam Ahmad berkata begitu kerana kebanyakan riwayat berhubung dengannya kalau ada pun sanadnya, ia sama ada munqathi' atau mursal.

Di bawah ini dikemukakan dua contoh tafsir dengan atsar Tabi'in. Dalam mentafsirkan firman Allah yang terdapat di dalam ayat 31 Surah an-Nur iaitu أَوِ التَّابِعِينَ غَيْرِ أُولَى الْإِرْبَةِ مِنَ الرِّجَالِ Bermaksud: "atau pelayan-pelayan laki-laki yang tidak mempunyai keinginan terhadap wanita."

Qataadah (m.118H) seorang Tabi'i yang terkenal berpendapat, ia bererti orang-orang yang bergantung hidupnya kepada seseorang untuk mendapat makanan dan minumannya. Mereka pula telah tua dan tidak berkeinginan kepada perempuan.

Menurut Mujahid (m.107H) pula ia adalah laki-laki bodoh yang langsung tidak ada keinginan kepada wanita.

(5) Tafsir Al-Qur'an Berpandukan Qaedah-Qaedah Bahasa `Arab (تفسير القرآن بقواعد اللغة العربية)

Usul kelima ialah mentafsir al-Qur'an berpandukan qaedah-qaedah bahasa `Arab. Usul ini tidak kurang pentingnya daripada usul-usul yang tersebut sebelumnya.

Pentafsir mestilah seorang yang mempunyai latar belakang yang kukuh dalam bahasa `Arab. Ia mestilah mahir dalam ilmu Nahu, Sharaf, bahasa `Arab dan Balaghah dengan segala cabang-cabangnya. Ia mestilah mengetahui semua bentuk tasybih, isti'arah, kinayah dan sebab-sebab ijaaz serta ithnaab, selain mampu mengesan sesuatu yang mahzuf (dibuang) di dalam sesuatu ayat, dan lain-lain perbahasan yang termasuk di bawah ilmu Bayan, Ma'ani dan Badi' yang merupakan cabang-cabang ilmu Balaghah.

Al-Qur'an diturunkan dalam bahasa `Arab. Tanpa penguasaan bahasa `Arab seseorang tidak mungkin dapat memahami al-Qur'an. Hadits-hadits Rasulullah s.a.w. juga dalam bahasa `Arab. Baginda s.a.w. bahkan merupakan orang `Arab yang paling fasih. Oleh itu seseorang yang hendak mentafsir al-Qur'an mestilah mengetahui selok-belok bahasa `Arab fusha yang digunakan di zaman Nabi s.a.w. Sya'er-sya'er `Arab jahiliah juga mestilah dijadikan rujukan, kerana ia merupakan contoh penggunaan bahasa `Arab fusha (standard) yang tulen. Itulah sebabnya Ibnu `Abbaas berkata: إذا أشكل عليكم شيء من كتاب الله فالتمسوه في الشعر فإن الشعر ديوان العرب Bermaksud: Jika timbul apa-apa kemusykilan (berhubung dengan bahasa `Arab) kepadamu, carilah jawapannya di dalam Sya'er (`Arab jahiliah). Kerana Sya'er (`Arab jahiliah) itu adalah kamus bahasa `Arab.

Di bawah nanti akan dikemukakan dua contoh penyelewengan dalam tafsir akibat mengabaikan usul kelima.

الذين آمنوا واتبعتهم اهليهم
والمؤمنات واتبعتهم اهليهن
اولئك هم المفلحون
9
الذين آمنوا واتبعتهم اهليهم
والمؤمنات واتبعتهم اهليهن
اولئك هم المفلحون

الذين آمنوا واتبعتهم اهليهم
والمؤمنات واتبعتهم اهليهن
اولئك هم المفلحون

الذين آمنوا واتبعتهم اهليهم
والمؤمنات واتبعتهم اهليهن
اولئك هم المفلحون

(a) Ada golongan anti hadits yang tidak mengerti bahasa `Arab menterjemahkan firman Allah: اضرب بعصاك الحجر yang sebenarnya bererti: “pukullah batu itu dengan tongkatmu”, dengan “bawalah pengikutmu berjalan di bukit”. Penterjemah anti hadits itu tidak mengetahui bahawa ضرب yang muta`addi bi nafsih bererti pukul atau memukul. Perkataan ضرب yang muta`addi dengan في saja bererti berjalan, berpergian atau bersiar-siar.

(b) Seorang sufi sesat pula mentafsirkan firman Allah di dalam ayat ke 69 Surah al-`Ankabut: وَإِنَّ اللَّهَ لَمَعَ الْمُحْسِنِينَ yang ma`na sebenarnya ialah: “dan sesungguhnya Allah benar-benar berserta orang-orang yang berbuat baik”, dengan “dan sesungguhnya Allah benar-benar telah menggilap orang-orang sufi.” Si jahil ini tidak sedar bahawa لام pada perkataan لَمَعَ bukan فاء fi`il, tetapi لام التأكيد (Lam yang merupakan kata penguat) pada khabar إِنَّ.

(6) Tafsir al-Qur`an menggunakan `aql fikiran (تفسير القرآن بالرأي)

Usul keenam ialah menyatakan pendapat setelah meneliti, merenung dan mengkaji al-Qur`an berpandukan usul-usul yang tersebut di atas. Allah mengurniakan `aql kepada manusia. Al-Qur`an pula menggesa manusia menggunakan `aqlnya. Maka seseorang ahli tafsir hendaklah sentiasa menggunakan `aql dalam kajiannya terhadap al-Qur`an. Dengan menggunakan `aql, wujudlah kefahaman yang mendalam tentang agama (تفقه في الدين). Lihatlah bagaimana doa Rasulullah.s.a.w. untuk Ibnu `Abbaas, seorang yang kemudiannya terbilang sebagai tokoh utama dalam tafsir. Bukankah baginda mendoakan agar beliau mendapat kefahaman yang mendalam tentang agama dan agar diajar Allah kepadanya ilmu tafsir al-Qur`an? Begini doanya: اللهم فقهه في الدين وعلمه التأويل Bermaksud: “Ya Allah, kurniakanlah kepadanya (Ibnu `Abbaas) kefahaman yang mendalam tentang agama dan ajarlah dia ilmu tafsir al-Qur`an.” (Hadits riwayat Ahmad da Ibnu Abi Syaibah).

Saiyyidina `Ali pernah berkata, tidak ada apa-apa ilmu khusus atau rahsia pada kami, selain kefahaman tentang al-Qur`an yang Allah kurniakan kepada seseorang (إلا فهما يعطيه الله رجلا في القرآن). (Atsar riwayat al-Bukhari). Kata-kata Saiyyidina `Ali ini selain menolak da`waan golongan Bathiniah, menonjolkan juga betapa istimewanya kefahaman hasil

kajian terhadap al-Qur'an dengan menggunakan 'aql fikiran. Kefahaman dan pemahaman al-Qur'an secara mendalam itulah sebenarnya yang dikatakan tafsir al-Qur'an menggunakan fikiran (التفسير بالرأي).

Peringatan:

Perlu sekali difahami dengan baik pengertian mentafsir al-Qur'an dengan menggunakan fikiran. Seseorang orang mengharamkan semua bentuk tafsir yang menggunakan 'aql fikiran. Seseorang yang lain pula mengambil kesempatan daripadanya dan bertindak mentafsirkan al-Qur'an dengan sewenang-wenang dan sesuka hati. Imam Ibnu Taimiyyah di dalam Muqaddimah Usul Tafsirnya telah menulis beberapa panduan penting berhubung dengan perkara ini. Penulis akan menyaringnya menggunakan bahasa yang mudah dan ringkas. Kata beliau: "Tafsir menggunakan fikiran terbahagi kepada dua. (a) Tafsir menggunakan fikiran yang terpuji (التفسير بالرأي المحمود). (b) Tafsir menggunakan fikiran yang tercela (التفسير بالرأي المذموم).

Tafsir menggunakan fikiran yang terpuji ialah mentafsir sesuatu ayat al-Qur'an secara bersepadu. Dengan cara mengemukakan ayat-ayat lain yang ada kaitan dengannya, mengemukakan hadits-hadits sahih yang membantu penafsirannya di samping membatalkan hadits-hadits dha'if dan maudhu' yang dikaitkan dengannya, menyebutkan ijma' Sahabat jika ada, membawa beberapa pendapat mereka dan mentarjihkan mana yang rajih daripadanya, menyatakan pendapat Tabi'in yang boleh dan tidak boleh dijadikan dalil, membincangkannya berdasarkan qaedah bahasa 'Arab secara tuntas, lalu mengemukakan pendapat atau membuat kesimpulan dan keputusan berlandaskan dalil-dalil yang kukuh dan teguh. Mentafsirkan al-Qur'an dengan cara seperti itulah yang dikatakan 'tafsir menggunakan fikiran yang terpuji'. Tafsir seperti ini memang terpuji dan menjamin kedudukan yang tinggi di sisi Allah.

Tafsir menggunakan fikiran yang tercela pula ialah tafsir dengan menggunakan fikiran semata-mata tanpa menghiraukan segala usul yang telah disebutkan sebelum ini. Orang yang mentafsir al-Qur'an menggunakan fikiran tercela akan mencari dalil-dalil atau sokongan-sokongan daripada al-Qur'an untuk menyokong dan menguatkan sesuatu fahaman yang telah sedia padanya. Dia mengutamakan 'aqlnya dan menolak hadits-

hadits sahih yang bercanggah dengannya. Dia tidak percayakan mu'jizat. Dia bahkan selalu saja menyalahi qaedah-qaedah bahasa 'Arab yang disepakati ahli-ahli bahasa. Pentafsir seperti ini bukan sekadar tercela malah akan diseksa Allah di akhirat nanti. Ini kerana ia bukan sahaja menyesatkan dirinya, malah menyebabkan orang-orang lain juga sesat. Semoga Allah melindungi kita semua daripada perbuatan sebegini. Menurut Imam Ibnu Taimiyyah r.a. perbuatan mentafsir al-Qur'an dengan menggunakan 'aqal semata-mata adalah haram (وأما تفسير القرآن بمجرد الرأي فحرام). Setelah menukilkan sekian banyak kata-kata Sahabat dan Tabi'in tentang tafsir menggunakan fikiran yang terpuji, beliau berkata, tidak salah mentafsirkan al-Qur'an menggunakan fikiran yang terpuji itu. Mana ada ahli tafsir di dunia ini yang langsung tidak mengguna fikirannya, kemudian menyatakan pendapatnya ketika mentafsir al-Qur'an? Kata beliau lagi: فاما من تكلم بما يعلم من ذلك لغة وشرعا فلا حرج عليه Bermaksud: "Adapun orang yang mahir dalam bahasa 'Arab dan alim tentang syari'at, maka tidak mengapa ia mentafsir al-Qur'an menurut pendapatnya." Para ulama salaf akan memberikan pendapat mereka tentang sesuatu ayat al-Qur'an, jika mereka mempunyai pengetahuan tentangnya. Dalam keadaan mereka tidak mempunyai pengetahuan pula, mereka akan mendumuskan diri sahaja. Mendumuskan diri dalam keadaan anda mempunyai pengetahuan tentang al-Qur'an adalah satu dosa besar. Ia termasuk dalam menyembunyikan agama Allah.

Seorang ahli tafsir, biar bagaimana hebat dan ikhlas sekalipun, tetap mungkin melakukan kesilapan. Kerana ia tetap seorang manusia. Ia hanya seorang umat, bukan seorang nabi atau rasul yang ma'shum. Bagaimanapun ada perbezaan di antara kesilapan yang berlaku pada seorang pentafsir ahli as-Sunnah yang ikhlas dan pentafsir dari kalangan ahli bid'ah. Pentafsir dari kalangan ahli as-Sunnah yang ikhlas dan menggunakan qaedah-qaedah usul tafsir dengan sebaik-baiknya diampunkan jika tersalah dalam pentafsirannya. Sedangkan pentafsir dari kalangan ahli bid'ah tetap dikira bersalah, meskipun benar dalam pentafsirannya. Ini kerana kebenaran dan ketepatan tafsirannya hanyalah satu kebetulan semata-mata.

Perincian Yang Tidak Berfaedah Dalam Tafsir

Seseorang pelajar tafsir hendaklah mengetahui bahawa di dalam sesetengah tafsir yang menjadi rujukan umat terdapat sekian banyak cerita yang dikaitkan dengan sesuatu

firman Allah s.w.t. Padahal ia langsung tidak berasas dan tidak bersanad. Malah terdapat juga di dalamnya perincian-perincian yang tidak berfaedah. Oleh itu apabila mentafsir al-Qur'an, anda hendaklah berpada dengan riwayat-riwayat yang sahih meskipun ia tidak terperinci. Sibuk mencari ma'lumat tentang berapakah panjang dan lebar bahtera Nabi Nuh a.s. adalah sesuatu yang sia-sia dan tidak berfaedah. Berapakah sebenarnya bilangan Ashab al-Kahfi juga sesuatu yang tidak perlu dipastikan. Kalau ia betul-betul diperlukan, tentu Allah dan RasulNya telah memberitahu tentangnya. Apa yang perlu ditekankan sebenarnya ialah tentang maksud al-Qur'an mengemukakan sesuatu cerita. Kenapa misalnya Allah telah memerintah Nabi Nuh supaya membuat bahtera. Kenapa Ashab al-Kahfi terpaksa berlindung di dalam gua tempat persembunyian mereka. Apakah perkara yang mendorong mereka lari ke gua itu?